

სსიპ - ივანე ჯავახიშვილის სახელობის თბილისის სახელმწიფო უნივერსიტეტში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების მიღების წესი

მუხლი 1. ზოგადი დებულებანი

1. ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების მიღების წესი (შემდგომში - „წესი“) არეგულირებს სსიპ - ივანე ჯავახიშვილის სახელობის თბილისის სახელმწიფო უნივერსიტეტში (შემდგომში - „თსუ“) ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების ჩარიცხვის პროცედურას.
2. ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების შერჩევას და წარდგენას უზრუნველყოფს შესაბამისი ფაკულტეტი, ხოლო ჩარიცხვასთან დაკავშირებულ პროცედურებს თსუ-ის სასწავლო პროცესის მართვის დეპარტამენტი. (17.05.2017, №54/2017)

მუხლი 2. წესის მიზანი

ამ წესის მიზანია თსუ-ში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტთა/მაგისტრანტობის კანდიდატთა ჩარიცხვის პროცედურების უზრუნველყოფა, ასევე სტუდენტთა მობილობის ხელშეწყობა.

მუხლი 3. თსუ-ის სტუდენტის სტატუსის მოპოვება

ერთიანი ეროვნული გამოცდების/საერთო სამაგისტრო გამოცდების გავლის გარეშე თსუ-ში სწავლის მსურველი აბიტურიენტები/მაგისტრანტობის კანდიდატები/სტუდენტები უნდა აკმაყოფილებდნენ კანონმდებლობით დადგენილ მოთხოვნებს.

მუხლი 4. თსუ-ში წარმოსადგენი დოკუმენტების ნუსხა

1. ერთიანი ეროვნული გამოცდების გავლის გარეშე სწავლის უფლების მქონე აბიტურიენტის/სტუდენტის მიერ წარმოსადგენი დოკუმენტების ნუსხა:
 - ა) განცხადება რექტორის სახელზე (საგანმანათლებლო პროგრამის მითითებით);
 - ბ) მოქალაქეობის დამადასტურებელი დოკუმენტის ასლი;

გ) უცხო ქვეყანაში მიღებული სრული ზოგადი ან მისი ეკვივალენტური განათლების დამადასტურებელი დოკუმენტის ასლი;

დ) უცხო ქვეყნის უმაღლეს საგანმანათლებლო დაწესებულებაში (შემდგომში - „უსდ“) მიღებული შეფასებების და კრედიტების დამადასტურებელი დოკუმენტის ასლი პირებისათვის, რომლებიც სწავლობენ/სწავლობდნენ და მიღებული აქვთ კრედიტები უცხო ქვეყანაში ამ ქვეყნის კანონმდებლობის შესაბამისად აღიარებულ უსდ-ში;

ე) მოქალაქეობის არმქონე პირის განცხადებას მოქალაქეობის დამადასტურებელი დოკუმენტის ნაცვლად უნდა დაერთოს ბინადრობის მოწმობის ასლი.

2. საერთო სამაგისტრო გამოცდების გავლის გარეშე მაგისტრანტობის კანდიდატის მიერ წარმოსადგენი დოკუმენტების ნუსხა:

ა) განცხადება რექტორის სახელზე;

ბ) მოქალაქეობის დამადასტურებელი დოკუმენტის ასლი;

გ) უცხო ქვეყნის მიერ აღიარებული უსდ-ის მიერ გაცემული უმაღლესი განათლების შესაბამისი კვალიფიკაციის დამადასტურებელი დოკუმენტის ასლი (დიპლომი);

დ) უცხო ქვეყნის უსდ-ში მიღებული კრედიტების დამადასტურებელი დოკუმენტის ასლი პირებისათვის, რომლებიც სწავლობენ/ სწავლობდნენ და მიღებული აქვთ კრედიტები უცხო ქვეყანაში ამ ქვეყნის კანონმდებლობის შესაბამისად აღიარებულ უსდ-ის მაგისტრატურაში;

ე) მოქალაქეობის არმქონე პირის განცხადებას მოქალაქეობის დამადასტურებელი დოკუმენტის ნაცვლად უნდა დაერთოს ბინადრობის მოწმობის ასლი;

ვ) მაგისტრანტობის კანდიდატმა, რომელიც უსდ-ში ჩაირიცხა ერთიანი ეროვნული გამოცდების გავლის გარეშე, უნდა წარმოადგინოს:

ვ.ა) დადგენილი წესით ჩარიცხვის შედეგად მიღებული კვალიფიკაციის დამადასტურებელი დოკუმენტის – დიპლომისა და დიპლომის დანართის ასლი/ცნობა ხარისხის მინიჭების თაობაზე;

ვ.ბ) უსდ-ის ხელმძღვანელის აქტი, რომელიც ადასტურებს უსდ-ში უმაღლესი განათლების პირველ საფეხურზე პირის ერთიანი ეროვნული გამოცდების გავლის გარეშე ჩარიცხვას.

3. უცხო ენაზე შედგენილი დოკუმენტები უნდა იყოს თარგმნილი ქართულ ენაზე და დამოწმებული ნოტარიუსის მიერ.

მუხლი 5. ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/სტუდენტების/მაგისტრანტობის კანდიდატების მიღების წინაპირობები (17.05.2017, №54/2017)

1. ერთიანი ეროვნული/საერთო სამაგისტრო გამოცდების გავლის გარეშე სწავლის უფლების მქონე პირთათვის საბაკალავრო/სამაგისტრო საგანმანათლებლო პროგრამებზე ვაკანტური ადგილები განისაზღვრება თსუ-ის რექტორის ინდივიდუალური ადმინისტრაციულ-სამართლებრივი აქტით.

2. ვაკანტური ადგილის არსებობის შემთხვევაში აბიტურიენტის/სტუდენტის/მაგისტრანტობის კანდიდატის შერჩევას ფაკულტეტის მიერ განსაზღვრული კრიტერიუმების საფუძველზე ახორციელებს შესაბამის ფაკულტეტზე ამ მიზნით შექმნილი კომისია.

2¹. ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე პირებისათვის პროგრამის ენის ცოდნის დადგენის მიზნით გასაუბრების ჩატარებას უზრუნველყოფს თსუ ენების შემსწავლელი ცენტრი/ფაკულტეტი რექტორის ინდივიდუალურ-ადმინისტრაციული სამართლებრივი აქტით განსაზღვრულ ვადებში. (28.06.2018, №162/2018)

3. მაგისტრატურაში მიღების პირობები განისაზღვრება სამაგისტრო საგანმანათლებლო პროგრამის წინაპირობების გათვალისწინებით.

4. თსუ-ის რექტორის წერილობითი თანხმობა პირის მიღების შესაძლებლობის თაობაზე - სახელის, გვარისა და საგანმანათლებლო პროგრამის მითითებით, გაიცემა სტუდენტთა საერთო რაოდენობის ფარგლებში არსებულ ვაკანტურ ადგილზე შესაბამისი ფაკულტეტის წარდგინების შემთხვევაში.

5. თსუ-ის რექტორის წერილობითი თანხმობა ბოლო საკონკურსო ადგილზე გასულ ორ ან მეტ პირზე გაიცემა ვაკანტური ადგილების გადაჭარბებით.

მუხლი 6. ამოღებულია (17.05.2017, №54/2017)

მუხლი 7. თსუ-ში ჩარიცხვა

1. უსდ-ში სწავლის უფლების მინიჭების თაობაზე საქართველოს განათლებისა და მეცნიერების მინისტრის ინდივიდუალური ადმინისტრაციულ-სამართლებრივი აქტის საფუძველზე აბიტურიენტს/სტუდენტს/მაგისტრანტობის კანდიდატსა და თსუ-ს შორის ფორმდება ხელშეკრულება.

2. ხელშეკრულების გაფორმების შემდეგ გამოიცემა რექტორის ინდივიდუალური ადმინისტრაციულ-სამართლებრივი აქტი ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების ჩარიცხვის თაობაზე.

3. თსუ უზრუნველყოფს სტუდენტის ჩართვას სასწავლო პროცესში სააუდიტორიო მეცადინეობების დაწყებიდან 4 კვირის ვადაში. (27.10.2014, №110/2014)

3¹. თსუ უზრუნველყოფს მედიცინის ფაკულტეტის ერთსაფეხურიან ინგლისურენოვან საგანმანათლებლო პროგრამაზე „მედიცინა“ ერთიანი ეროვნული გამოცდების გავლის გარეშე სწავლის უფლების მქონე აბიტურიენტების ჩარიცხვას სემესტრის განმავლობაში. მედიცინის ფაკულტეტი, საგანმანათლებლო პროგრამით განსაზღვრული სწავლის შედეგების მისაღწევად, უზრუნველყოფს სტუდენტების სასწავლო პროცესში ჩართვას და მათთვის ინდივიდუალური საგანმანათლებლო პროგრამის შეთავაზებას, რომლის თავისებურებების გათვალისწინებით, სასწავლო წლიური დატვირთვა არ უნდა

აღმატებოდეს 75 (ECTS) კრედიტს. (22.01.2018, №5/2018)

4. რექტორის ბრძანება დაუყოვნებლივ ქვეყნდება თსუ-ის ოფიციალურ ვებგვერდზე და აისახება სსიპ – განათლების ხარისხის განვითარების ეროვნული ცენტრის საგანმანათლებლო დაწესებულებების რეესტრში.

მუხლი 8. სწავლის საფასური

სწავლის საფასურის ოდენობა განისაზღვრება ჩარიცხვის წლისათვის დადგენილი საუნივერსიტეტო ტარიფების შესაბამისად.